

行又問大德天尊冰有火耶水有水耶
天尊答曰聖行真士於虛空中見衆色像聖
行又問大德天尊於冰求火於水求水斯見
慶邪

天尊答曰聖行真士見身求道滅諸有為求
得解脫斯非是慶若求真道但自觀身若求
虛空但觀諸有觀身實相道從身生亦從心
生從眼耳生從鼻舌生從四大生從百體生
觀物真相空從天生亦從地生亦從我生亦
從他生從水花生從草木生從十方生從萬
物生以是義故我說此經度微塵衆而未嘗
見有一衆生得受度也何以故我眼既空衆
生亦空空无分別空故是故我眼智慧
明淨能觀一切通達无礙觀諸三千大千世
界過去未來一切衆生悉已受度以是因緣
我說空中具足一切无量色像於是聖行并
諸大衆聞說要言俱起作禮而說偈言

具足一切智 善哉奇特尊
說今微妙法 邪正甚分明
顛倒生取捨 正真非有元

心法非本有 有心虛妄生
善巧順諸有 有滅齊正真
正真无復相 煩惱實本空
衆生不異道 諸見悉无為
有心欲除斷 大行永不行
三清非遠妙 寐滅在宵襟
若起有心見 患牙永消摧
天尊說此類 名為憎慢人
猶如畏大地 疾走欲藏身
縱日馳千里 非地不容身
厭身欲求道 見道不忘身
存身去道遠 生死反成親
至真无起滅 大道離斷常
若有體斯妙 名為修正真
衆生由障重 失道唯見身
將身欲求道 觀色不知空
譬如愚見木 不知火所從
影響非殊遠 形聲是本源
邪見生煩惱 蕪穢荆棘叢
有見生毒害 傷身何異斯

大乘妙林經卷上

三清即煩惱 大道諒我身
猶如木中火 鑽具及人功
積善求真道 安樂會正真
說經度一切 算數不能量
照本元來去 受慶悉虛陳
虛空諒无際 衆生何所依
我眼本清淨 通達了大千
未來及過去 見在盡微塵
久於无量劫 悉已會正真

大乘妙林經卷中

與二

觀身品第四

爾時大慈真人即從座起稽首禮問白天尊
 言我等今衆心自念言天尊所說微妙難思
 煩惱真相性無差別其義幽微我今等衆親
 承聖旨得釋所疑將來衆生心根未悟聞此
 大法云何得解天尊所說三清非遠道即我
 身一切衆生聞身有道未了斯義益加疑經
 當以何法得釋彼疑令諸衆生泰然安樂
 天尊答曰善哉善哉大慈真士於无量劫荷
 負一切衆生苦惱故於今日善發斯問予今
 復座吾當為說今諸將來有心之人使得安
 樂若有衆生入我法門聞我妙義未能曉了
 當以三法安慰其心令得開悟何謂三法一
 者若有衆生聞此大乘未能信受當以五戒
 修攝其身令无放逸五根明淨體性調和於
 法无畏堪任聽受二者若有衆生聞此大乘
 未能善解當以三定繼錄其心令无動應心
 地端靜性氣調和於法无畏堪任誦持三者
 若有衆生聞此大乘未能通觀當以六慧通

被身心令无障礙內外明淨身意澄澈慧洞
 虛空了見真性於法无畏堪任寄付何謂三
 戒一者若有眼根貪著色塵當以妙林大戒
 觀彼色塵隨時遷易念念无常无可貪著觀
 我眼根與彼无異二者若有耳根貪著聲塵
 當以妙林大戒觀彼聲塵隨時遷易念念无
 常无可貪著觀我耳根與彼无異三者若有
 鼻根貪著香塵當以妙林大戒觀彼香塵隨
 時遷易念念无常无可貪著觀我鼻根與彼
 无異四者若有舌根貪著味塵當以妙林大
 戒觀彼味塵隨時遷易念念无常无可貪著
 觀我舌根與彼无異五者若有身根貪著法
 塵當以妙林大戒觀彼法塵隨時遷易念念
 无常无可貪著觀我身緣與彼无異何謂三
 定一者若有衆生心神馳動多所貪著當以
 妙林大定觀諸世間如幻如夢如焰如電非
 真實有既知非有心不馳動是名安定二者
 若有衆生心神馳動多所瞋恚當以妙林大
 定觀諸世間如聲如響如霧如雲非真實有
 既知非有无所瞋恚名為法定三者若有衆

生心神馳動多有癡慢當以妙林大定觀諸
 世間如風如空如泡如影非真實有既知非
 有无可癡慢名為決定何謂六慧一者既了
 彼色隨時遷易念念无常无可貪著眼根清
 淨名為見慧二者既了彼聲隨時遷易念念
 无常无所貪著耳根清淨名為聞慧三者既
 了彼香隨時遷易念念无常无所貪著鼻根
 清淨名為通慧四者既了彼味隨時遷易念
 念无常无所貪著舌根清淨名為辨慧五者
 既了諸法隨時遷易念念无常无所貪著身
 緣清淨名為覺慧六者既了三毒隨時遷易
 念念无常无所障礙心根清淨名為洞慧大
 慈真士若後末世一切衆生欲入法門當以
 三法安定其心令无所畏既元畏已自然安
 樂身心堅固常住不動六慧明淨通達无礙
 觀諸世間无非妙相以是當知不斷煩惱而
 得真相汝等今衆勿以此法輕示非人一念
 疑毀萬劫不生慎之慎之
 爾時通真入白天尊言我等今衆得聞大
 法身心踴躍快樂安穩得无所畏不可思議

猶有疑昧未敢諮陳伏願天尊特垂聽許
 天尊告曰通通真士有所疑網怨汝所問吾
 當辯說以示未聞於是通通白天尊言大德
 法王云何說言若有眾生欲入法門當以三
 法安慰其心令得安樂一切眾生本有心邪
 若是有心心性已定云何說言以此三法安
 定其心令得無畏若本无心云何得定而今
 說言以此三法安慰其心令得定邪
 天尊告曰善哉斯問諦聽諦聽吾當辯說令
 諸將來得了所疑通通真士一切眾生心法
 如生云何一切眾生心法如生一切眾生本
 有生邪若有生者生從何有一切眾生本无
 生邪若无生者見有生身汝等今眾見身有
 邪見身无邪通通答曰大德天尊我等今眾
 見身是无何以故前色滅後色生故
 天尊告曰通通真士心法亦爾非有非无念
 念生滅前心滅故不為後因後心生故不為
 前果是故我言一切眾生心法如生通通又
 言大德天尊既云一切眾生心法如生生法
 見生生法如心心可見邪

天尊答曰通通真士心法可見欲見心法還
 如見生生无方所欲見心法亦无方所通通
 又言大德天尊既云心法如生俱无方所云
 何安慰令得安樂
 天尊答曰通通真士身可安邪通通答言大
 德天尊身法念念不可安慰
 天尊告曰通通真士心法亦然不可安慰通
 通又言大德天尊既不可安云何向言安慰
 其心令得樂邪
 天尊答曰通通真士為見有身故令安慰既
 安慰已知心非有亦復非无非有非无名得
 真心故得安樂是故我今以此三法安慰其
 心令得安樂是諸大眾聞天尊說感皆開悟
 同聲稱善而說偈言
 法王三界大悲尊 見身端坐不思議
 為眾演斯微妙法 開悟群生无上因
 故知煩惱同真相 了達道場等无明
 初學心中未清靜 大慈方便啓重昏
 故得天尊為敷演 妙林三法曉初心
 五戒觀身五根靜 三定攝心三毒除

一乘遍被三千土 六慧重修九夜清
 了悟幻夢非真有 非真有法亦非空
 故得住居安樂土 非空幻有悉常存
 常存非離人間土 人中妙相甚奇安
 昔日未悟名煩惱 今辰大覺號真仙
 一體兩名隨物見 好見兩名同一身
 通通至真无上士 懷念慙慙不離心
 請問眾生所生得 有心无心定云何
 今蒙大悲无上訣 眾生有心心若生
 生法非无亦非有 有心非有亦非无
 前生後生不相續 有心无心不相因
 見身非有同心法 求心非无如見身
 能知身心非一異 豈執身心定有无
 說去兩偏无所兩 又忘一中何所中
 偏中了然无所有 重玄微妙不思議
 故得身心可安慰 真心萬劫永常存
 爾時天尊聞諸大法說偈頌已告諸真人汝
 等大眾於此座會深解法相快樂安隱誠如
 所言真實无異於將來世咸令眾生皆得開
 悟是時大眾咸皆歡喜稽首受命同時而退

童子問品第五

爾時侍座童子名曰慧明從座而起整頓衣冠稽首作禮上白天尊言大慈天尊微妙光明普照十方微塵世界一切國土諸真聖衆无億數人俱來集會不思議城土地平正宮殿希有容微塵衆无有迫迤此地何緣而有斯妙衆真行業修何功德過值寶光得入斯座希有難思聞此妙林快樂無極願垂告誨開悟將來於是天尊歎童子言善哉善哉慧明童子善能激發微妙因緣使將來世得釋所疑不思議山名大福堂出離生死國土清淨非是二乘所能觀見過去未來三世天尊之所集會一微塵土容八萬衆不可思議宮殿林榻百味甘香衣服臥具花菓林木通身浴池皆是七寶若有所須應念而至福德之土不可思議非我今日言所能盡十方國土三千世界一切微塵无數衆真人集會皆是上士純一無二智慧圓明了諸法性於无量劫植衆德本故於今日遇值光明而得集會見我今日微妙大乘宣通法教普度无量

一切衆生得聞此經妙林名字一章一句當知是人塵沙身分所有三業造諸過惡皆悉清淨不復受報若有衆生聞此經名及以誦念一章一句其人所生常居淨土衣食充足无所乏少聞此經已不墮三惡刀山劔樹銅柱煙炭寒冰鐵床一切苦報自然摧滅所經行處常居快樂兵災毒獸不能傷害童子又問大德天尊願為廣說真人所行觀諸法性以何心力而得自在通達无礙復過專經聞微妙法

天尊告曰慧明童子真人所行於諸法中无所希望心性滅故觀諸色法不生貪著知眼空故聞諸音聲不生貪著知耳空故聽諸香氣不生貪著知鼻空故繫諸美味不生貪著知舌空故持諸寶物不生貪著知手空故行諸平地不生貪著知足空故見諸天堂不生娛樂知无我故見諸地獄不生怖畏知无苦故見人施與不生歡喜知无得故見人劫奪不生瞋怒知无失故見人讚歎不生欣悅知无譽故見人毀辱不生患恨知无損故見玉

京山不以為高无長相故見諸堆阜不以為卑无短相故見諸驛樹不以為賒无壽相故見諸種花不以為促无天相故見大羅天不以為過无大相故見諸毫末不以為細无小相故見諸猛火不以為熱无燒相故見諸沸海不以為濡無濕相故見諸彫畫不以為能无巧相故見諸愚訥不以為頑无拙相故見諸布施不以為難無財相故見諸貪悻不以為惜无慳相故見諸衆生不以為異无有相故見諸虚空不以為一无无相故見諸親族不以為惡无愛相故見諸怨家不以為惡无憎相故見諸天地不以為久无住相故見諸電光不以為疾无去相故見日初出不以為東无出相故見日終沒不以為西无沒相故无西无沒无日沒故无東无出无日出故以是當知真人見法而不見故以不見故故於今日得居淨土值希有光闡我今日演說大乘微妙經典能以一心信解受持爾時侍座童子名曰善信從座而起稽首作禮一心瞻仰白天尊言大德天尊所說甚深

微妙難思若有眾生聞斯法者以何心力而得開悟

天尊告曰善信童子若有眾生得過斯經未能善解當以慧心觀察其身眼耳鼻舌一切諸根為是有邪為是无邪為有因邪為无因邪若言有我眼耳諸根因四大生而有我者當自思惟四大性空云何得合若四大空合我身身從四大四大既空我身亦空何以故由本空故若言我身眼耳諸根因四大生四大性異云何得合若四大異合成我身身從四大我身亦異何以故由本異故若言我身眼耳諸根因四大生四大非合去何我身四大合生四大非合合生我者虎鹿蛇鼠性非合故云何合生以是當知我今身者如風如影如露如電如幻如夢如聲如響畢竟寂滅了无因故能知是見名為法觀以此心力能生无量諸功德門住於三清常居淨土能於諸見心无起動以一慧心觀諸萬類悉皆清淨善信童子得聞是已心生歡喜歎未曾有於是天尊而說偈曰

我今所演說	一切諸天尊
過去及未來	皆同一心力
十方微塵土	所有諸法五
俱演微妙義	一乘无上經
若有一人聞	一章一句偈
誓心欲奉持	宣通未來世
如此善男子	及以善女人
所在經行處	灾疫不敢傷
若有一心念	五苦盡消摧
又請說真士	所行奇特因
真人所得法	觀身知悉空
苦樂无二相	憎愛悉齊同
高卑无異趣	大小不殊形
日出非初合	日沒詎終亡
東西无定所	出沒亦无方
又問何心力	得斯平等觀
示以慧觀法	支節並消融
四大性非合	虎鹿不同群
以是知虛幻	露電盡皆空
畢竟无起滅	法觀心日明

常居清淨土 長樂永未央
是時侍座童子諸來大眾聞天尊說微妙偈
頌歡喜踴躍歎未曾有於是大眾一時稽首
同聲稱善作禮而退

隨順品第六

爾時天尊告遍通言於末世中若有一人解我所說稱揚妙義宣示未聞令得了悟能體深義不隨文字知諸法性无可貪著當知是人已於无量无邊諸天尊所種植善功久已成辨世間人民於其人處供給供養衣食卧具香花燈燭資身藥餌諸所之无隨順給與能如此者所得功德與我所寶功德无異何以故如是人者即是大乘无上法牙紹隆法藏令无斷絕其入前曾入寶城聞我大乘微妙經典託生下土宣我正教是故我說供養此人與我无異何以故是人深知我之妙趣隨宜說法无所執滯是故世間供養是人功德无量遍通自言大德天尊何謂隨宜順衆生說无所執邪
天尊告曰遍通真士我所說法隨順衆生說

一乘經說三世法說有為法說無為法說人間法說出世法說穢濁法說清淨法說罪說福說苦說樂說因說果如是等說名為隨順衆生世間猶如幻師所作幻術無有決定又如夜夢所有見事皆悉虛妄無有真實若有衆生深達斯義如此之人是我真子堪任委寄東持法藏令無斷絕通通白言大德天尊所說要妙隨順世間無有決定無罪福邪無苦樂耶

天尊答曰通通真士我所說法隨順衆生說罪為福說福為罪說苦為樂說樂為苦是故我所說法無有決疑通通白言大德天尊何謂說罪為福說福為罪說苦為樂說樂為苦既無決定一切衆生云何修習出離生死得真解脫

天尊答言通通真士我所說法說罪為福一切衆生所作衆罪罪性本空無所有故說福為罪一切衆生所作之福有心希望貪著福故乃至苦樂因果諸所說法亦復如是以此當知我說罪福苦樂因果亦無決定若人能

知諸法不定心無所繫無所繫故名得解脫不復往來生死六趣常樂清淨安住不動是名隨宜順世間說隨宜說者汲引衆生無有決定以不決定令諸衆生得入定位無所怖畏能入三界為衆導師度脫一切無量衆生得入常樂爾時通通又復白言大德天尊我自思惟我等大眾聞說妙義心中了然無復疑惑於將來世有諸衆生聞斯深奧未能決了天尊所說罪福苦樂無決定相皆是隨順世間衆生以何心力而順世間無決定相

天尊答曰通通真士我今所說以大悲心熏修一切隨順世間所說文字言辭章句皆是方便隨方引接令得度脫有為虛妄無明苦惱曉了法性得見正真是名隨順衆生隨宜說法通通又問大德天尊何以於諸衆生而起大悲無虛妄邪

天尊答曰通通真士譬如有人問覓虛空我今說空是虛妄邪通通答言大德天尊如是說空空可說耶
天尊答曰通通真士空不可說我今說空虛

空既空我說亦空以是當知世間虛妄本无所有我說世間不憺虛妄何以故虛妄性空我說虛妄說妄亦空是故我說不憺虛妄通通白言大德天尊所說世間一切皆空隨順衆生有何利益

天尊答曰通通真士為化引故得出離故入空門故滅諸見故了無相故明無作故一切諸行畢竟寂滅永不復生既不生滅常住不動是故我今以大悲心隨順世間令諸衆生得此大利

爾時德滿真人即從座起稽首禮問白天尊言大德天尊云何真人於世間法心无所著天尊答曰德滿真士善哉斯問汝今等衆於意云何德滿答言大德天尊我自思惟真人所行心性寂滅无二相故若有二相即是虛妄我今觀法聞善不喜聞惡不怒无愛憎相心性寂滅无所希望觀諸世間猶如幻師見所幻事知此非真无所貪著真人所見一切世間諸有為法亦復如是知悉非真无所貪著是時侍座童子名曰上相聞真人說心大

歡喜踴躍无量言不能盡猶如長者亡所愛子已經數日忽然更活我今得聞真人說法歡喜亦然猶有疑昧未能自了前進稽首白真人言大德真士所說真人觀世間法无有二相无二相故无所貪著若有貪著即是虛妄虛妄法者猶有夢幻既非真有假使虛妄有何失耶真人答曰上相童子善能問我今諸將來得釋所疑我今所說若有衆生於有爲法多生貪著即是虛妄虛妄心起即有二見若有衆生能了二相二相无二當知此人所見虛妄亦无虛妄是故我今所說法言若有二見貪著世間即是虛妄无二見者觀諸虛妄悉非世間既非世間即无二見无二見故亦无虛妄以是當知了虛妄者觀諸世間實无所失上相童子又復問言大德真士所說虛妄由有二見貪著世間皆從心起未了世間及以心法何者爲因以何爲果爲是心法能生世間爲是世間能生心法若无心法誰取世間若无世間心何所取若云心法能取世間未有心法應无世間若云世間心有

所取未有世間應无心法如是二義實未能了願垂辯釋開示未聞
 真人答曰上相童子吾今語汝心法世間非因非果非前非後非一非異非有非无而亦有无亦有无亦是一異乃至因果譬如鷄母能生鷄子猶如鷄子復生鷄母如是母子非因非果非前非後非一非異非有非无而亦有无亦是一異乃至因果若了无生无如是問若有所得名爲邪問邪問之人永失无量大乘知見上相童子云何於空谷響而求生相於焦殺中而求牙相心法世間亦復如是畢竟未滅不可論說如大毒藥不可得嘗如盛猛火不可親近說世間相及說心法如盲說色如聾說聲畢竟元因不可論說
 爾時天尊歎德滿言善哉善哉實如所言善能分別心法世間二无所有俱不可說深實要言於是大衆聞斯語已心大歡喜而說偈言
 妙哉奇特尊 開發如是問
 若有一人聞 解了深妙義
 宣通此大法 開示悟將來

當知此大士 已種无量功
 世間一切衆 當於是人處
 供給所乏須 功德量難思
 解此深奧義 是我真法子
 紹隆妙林典 能實无上才
 了我隨宜說 苦樂本元因
 猶如大幻師 見所爲幻事
 雖順人間法 慧心了无緣
 汲引諸衆生 決定入大乘
 達了世間性 解脫无珠殃
 我今說世間 不墮於虛妄
 問空求色像 辯空亦隨機
 德滿真大士 爲衆問行心
 既蒙无上質 自陳昔所行
 雖順世間法 所見无虛妄
 上相真童子 未了達所疑
 真人善通釋 水結並消融
 心性世間法 非果亦非因
 能知音說色 虛谷豈勞陳
 天尊歎真士 大衆悉披襟

爾時不思議城同聞大衆說偈頌已白天尊
言大德天尊唯願大慈不捨私心賜大光明
照於下方无量世界令彼下士得見寶光開
諸愚闇與道結緣令道反本於是

天尊舉手彈指无上寶光如鏡之圓從掌中
出徹照下方无量國土乃至三徒惡趣九幽
苦魂皆得明朗了了清淨地獄休息報對寧
閑聾盲六疾一切苦惱皆得歡樂人禽鳥獸
皆發善心不相傷害因此光明一切衆生舉
眼遙見不思議城如看掌中无有遺失見斯
光者必當得往長樂福堂入寶城中快樂无
極

大乘妙林經卷中

大乘妙林經卷下

衆真說法品第七

真三

爾時侍座童子名曰善見即從座起稽首禮
問白天尊言今日侍座得聞希有微妙經典
身心踴躍快樂難言天尊所說譬喻甚深非
是二乘所得聞見善哉斯座昔未曾經諸微
塵土一切衆真皆得集會此諸大士何以心
力觀諸法性而得值遇微妙尊經願為開示
真人所行觀諸法性令諸衆生皆得開悟
爾時天尊歎善見言善哉善哉侍座童子乃
能為諸將來衆生請我開演真人所行觀諸
法性於是天尊告諸真人汝今等衆遇我今
日微妙光明而得集會不可思議汝今等衆
皆悉上士純一无雜明了法性童子所請願
我廣說真人所行以何心力故於今日得聞
要說微妙大乘第一希有奇特妙義汝今等
衆宜各顯說真人行相令諸童子及將來世
一切衆生得了真人所行秘要大乘密行
爾時真人名曰妙相告諸童子等今衆一心
諦聽我等衆真欲為廣說真人所行觀諸法

性而得要妙開示未聞今得了悟真人所行
受諸禁戒一切威儀猶如世間諸善男女一
時聞法心意踴躍无所疑惑生決定心真人
亦爾從昔以來至无量劫於其中間所持禁
戒一切威儀心意踴躍无所疑惑生決定心
无復違退是名真人所行禁戒觀諸法性生
決定心寶光真人告童子言善見童子若諸
真人所行之法四无等心堅固不退是名真
人觀諸法性得決定心曜明真人告童子言
善見童子若諸真人觀一切法決定皆得成
无上道是名真人觀諸法性得決定心普等
真人告童子言善見童子若諸真人導引一
切无有偏愛生一子想是名真人觀諸法性
得決定心聖行真人告童子言善見童子若
諸真人於正行中心无動念觀諸色相无有
異性是名真人觀諸法性得決定心大悲真
人告童子言善見童子若諸真人入於苦難
濟授衆生心无違退是名真人觀諸法性得
決定心遍通真人告童子言善見童子若諸
真人心自思惟觀諸衆生无非真實是名真